

17 FEB 1998

Pernyataan-Mata Wang

MALAYSIA-SINGAPURA AKAN BERUSAHA STABILKAN MATA WANG

KUALA LUMPUR, 17 Feb (Bernama) -- Malaysia dan Singapura telah bersetuju untuk bekerjasama antara satu sama lain dan juga bersama rakan-rakan Asean yang lain untuk mengembalikan kestabilan mata wang serantau.

Para pegawai kedua-dua negara akan mengkaji cadangan menggunakan mata wang serantau dan pilihan lain dalam membiayai perdagangan di kalangan negara-negara Asean, menurut pernyataan bersama yang dikeluarkan oleh Wisma Putra di hari terakhir lawatan kerja dua hari ke Malaysia oleh Perdana Menteri Singapura Goh Chok Tong.

Cadangan untuk menggunakan mata wang sendiri memandangkan kejatuhan nilai mata wang negara-negara Asean berbanding dolar Amerika dan kelembapan ekonomi diutarakan di Sidang Kemuncak Tidak Rasmi Asean Kedua yang diadakan di sini, tahun lepas.

"Kedua-dua kerajaan akan menumpukan usaha untuk bekerjasama dalam bidang perbankan dan kewangan," menurut pernyataan itu.

Menurut pernyataan itu lagi, kedua-dua Perdana Menteri juga mengakui memandangkan krisis kewangan serantau, adalah penting kedua-dua negara bekerjasama dalam semua bidang yang mungkin.

Perdana Menteri Datuk Seri Dr Mahathir Mohamad dan Goh bertemu semalam bagi perbincangan yang bertumpu pada krisis mata wang sekarang ini serta isu-isu dua hala yang lain.

Negara-negara Asean telah membincangkan dengan mendalam untuk meningkatkan perdagangan di kalangan mereka menggunakan mata wang masing-masing ekoran kejatuhan nilai mata wang mereka berbanding dolar Amerika.

Dr Mahathir berkata, selepas pertemuan baru-baru ini dengan rakan sejawatannya dari Thailand, Chuan Leekpai, di Bangkok, Malaysia, Thailand dan Indonesia telah bersetuju mengkaji penubuhan rumah penjelasan bagi memudahkan penggunaan mata wang Asean dalam perdagangan di kalangan mereka.

Dalam pernyataan itu juga, kerajaan Singapura menyatakan keyakinannya terhadap prospek ekonomi Malaysia dan berkata ia akan menggalakkan sektor swastanya untuk melabur di Malaysia dan juga di sebaliknya.

"Dalam hal ini, kedua-dua Perdana Menteri menekankan pentingnya kedua-dua pihak saling memegang ekuiti dalam infrastruktur dan sektor ekonomi lain yang dapat meningkatkan kemakmuran kedua-dua pihak dan menjamin masa depan ekonomi," katanya.

Kedua-dua kerajaan juga menyambut baik penubuhan Majlis Perniagaan Malaysia-Singapura oleh sektor swasta untuk meningkatkan perdagangan dan pelaburan antara kedua-dua negara. -- BERNAMA

MAM PR